

平
閩
功
績
見
聞
錄

平

平閩功績見聞錄

康熙甲寅年三月十五日耿精忠執總督范承謨於藩邸而閩變起矣頃刻間馬兵四出卽閉城門傳令箭上書總統大將軍靖南王爲伐暴弔民事百姓俱令剪辮包網巾從明朝制度有不從者斬司道各官見撫院劉秉政業已從逆衆皆唯唯獨知府王之儀知縣劉嘉猷因出迎總督俱被戮海道陳啓泰亦被戮合家二十口俱自刎彼時布政司何中

魁進京陛見按司席式兵道呂應斗糧道李學詩等俱從逆本日封府庫次日遣僞都尉王老虎出城發號施令百姓奔竄四方搶掠無算

十六日遣都督曾養性都尉徐弘弼等領兵由延建往攻江山縣遲數月江山縣報捷耿精忠大喜行賞有差

後耿逆以糧草不資逼民間助餉或數千金及數百金不等凡紳衿富戶俱被抄沒數次

拷打不休

地丁錢糧每兩加耗五錢屯糧倍之又加派本色以給兵食又加派草料以養馬匹又按丁口派丁糧上丁每丁八兩中丁六兩下丁四兩不等又高擡鹽價按口銷鹽每日每人要食鹽二兩卽要納價二錢又派長夫每名二兩三兩不等計路途遠近以備挑運糧草及火藥戰具等項每舖五名十名不等又逼民間輸銅鑄錢文曰裕民通寶每一文

小者算銀一分大者算一錢再大者算一兩
以至二兩不用者以軍法從事有小民林捷
使不用裕民錢立即棄市是時百姓受耿逆
荼毒生不如死望大兵至不啻大旱之望雲
霓

後聞曾養性陷黃巖縣叅將武灝納欵城守
祖弘勲集文武於大觀亭議降巡道陳丹赤
永嘉縣馬瑛皆殉難民益惶恐

逆又招集土兵令百姓供養又大索民間鉛
錫鑄鳥鎗炮子百姓不得收租鄉間山寇蜂
起而錢糧又急如星火民困極矣望大兵至
不啻日以爲歲云

乙卯春聞大兵至杭與總督李之芳統兵會
剿等語至秋末聞貝子破岷縣繼又聞破
天台而逆索餉愈急百物湧貴蓋閩地濱海
全賴海物接濟民食此時海禁甚嚴鹹魚蝦
蚶之類一無所出餓死者遮道

丙辰春聞

康親王同

貝子破溫州又攻

處州甚急逆貽書伊叔耿繼美由江西統兵
同都督易明等襲抄大兵之後抵五顯仙霞
二關堅守不許大兵入閩

後聞耿繼美不從將書獻與 康親王轉送

貝子看 貝子喜極卽計誘曾養性導 康

親王入五顯嶺 貝子由慶元間道取路松

溪跋涉險阻墜崖拆指牽所乘馬以鞭作杖

殮風飲露於炎蒸草澤中仍由仙霞抵建寧

府與 康親王會合滿洲兵破延平封府庫

籍戶口於九月十八日抵福州適海寇鄭錦

作亂有賊兵三萬餘設營十四座於小門鎮

鳳山嶺上欲攻福省 貝子見事勢危急與

康親王議立遣賴將軍帶滿洲兵大破賊營

一十四座斬首數千一面傳檄興泉汀漳四

郡而福省平 貝子進光祿邸第 康親王

駐西門邸第 貝子見百姓紳衿遭耿逆荼

毒觸目傷慘卽傳令各旗兵丁不許難爲百

姓寬緩錢糧平買平糴毋得刻剝民間於是

化鋒鏑爲衽席民皆安堵如故 貝子之盛
德愛民如此宜百姓之朝夕焚香禱祝 貝
子於億萬斯年詎知 貝子以賢勞過度自
落二齒後且冒寒暑陡患痢疾醫藥罔效竟
於丙辰年十一月二十七日辰時薨於光祿
邸第聞訃之日百姓哭聲震天焚香奔叩靈
前甚至有嘔血昏倒於地者十數人嗟乎非
貝子之德入人深感人至何以有此蓋 貝
子之功在浙而德在閩宜閩之人所以謳思
不置至十二月出殯西郊百姓猶頂香遮道
跪哭僉曰何天奪我 貝子之速也 貝子
若長在吾閩則吾閩之人日受其庇豈不甚
幸而今已矣惟有崇祀特祠以報功德於不
朽云爾

貝子靈櫬於丁巳年各官護送進京

康親王至己未年方頒師進京

自甲寅春耿逆變後士有絕筆焚書之慘窓
下無事將耳目所見聞者筆之於書適

王師入閩將平閩功績附記於末以備參考未必

無少補云

皆

康熙己未九秋雲飛金泳記於道山草堂



